

1449, 18 septembre
Autorisation de fortifier le lieu du Queroy

1. Nous, Bertrand de Maulmont, seigneur dudit lieu de Maulmont, de Fromentau et de Saint Legier
2. Magnasoyz en partie, a tous ceulx qui ces *presentes* lectres verront et orront, salut. Sçavoir faisons que nous, de
3. nostre bon gré, pure et franche volonté, avons donné et donnons *par* ces *presentes* congié et licence a noble
4. homme Jacques Blanchet, seigneur du Queroyz en la parroisse de Saint Maurice pres La Soubsterraine, au pays
5. de Poictou, *pour* retraire et saulver luy et ses biens et ceulx de ses hommes, de faire emparer et fortiffier ledit
6. lieu du Queroyz estant en nostre justice et terre de Fromentau et tenu de nous a foy et homatge litge
7. et *serement* de feaulté, lequel a l'occasion des guerres et division avoit demeuré *comme* vague et en desolacion
8. *par* l'espace de soixante ans ou environ, *comme* de ce sommes deuement acertant, et de y fere tours, carneaulx,
9. lucaines, pont leveis, fossés, palis autour d'iceulx fossés, barrieres et toutez fortifficacions que bon luy samblent,
10. pourveu que si par le temps a venir nous estions presses *pour* les Angloys, anciens ennemis du
11. roy, ou autre noz ennemis, que ledit Jacques *sera* tenu de nous retraire en son dit hostel du
12. Queroyz a noz coustz et despens. Si donnons en mandement par ces *presentes* a *notre* seneschal de *notredite*
13. terre et seigneurie de Fromentau et a tous noz autres justiciers ou a leurs lieutenants *presentes* et a venir et
14. a *chaun* d'eulx qu'ilz facent, seuffrent et laissent ledit Jacques Blanchet et les siens joyr et user *plainement*
15. et paisiblement de noz *presentes* congié et licence et de tout le *contenu* en cesdites *presentes* sans luy faire mectre
16. ou donner ou souffrir estre fait, mis ou donné, ores ne au temps a venir, aucun empeschement ou destorbier,
17. au contraire mais se fait mis ou donné estoit en aucune maniere le reparent et remectent sans delay au
18. premier estat et deu, car ainsi nous plaist il estre fait, et audit Jacques Blanchet et aux siens l'avons
19. octroyé et octroyons de grace especial par ces *presentes*. Et afin que ce soit chouse ferme et estable a
20. tousjours, nous avons fait signer ces *presentes* du seing manuel de Loys Pasquaud, notaire royal, en la *presence*
21. de noble homme Pierre de Cossac, escuyer, et de messire Jehan Fedon, prestre, curé de Parrouze, et faictez sceller
22. de *notre* seel le dixhuytiesme du moys de septembre l'an mil quatre cens quarante et neuf.
23. Par le commandement de mondit seigneur. [*Signé* :] Loys Pasquaud.